

# Тату үйге тақсірет жуымайды

**Ж**ер-жаһанды шарпыған індеттен бүкіл әлем жұртшылығы алаң күй кешіп, халық саулығы сынға түсуде. Әлемді жаулаған Covid-19 елімізді айналып өтпеді.



Адамзатқа қауіп-қатер төндіріп тұрған жаман індет – коронавирус дертімен күресуде де халқымыз сабырлылық танытып, мүмкіндігінше түрлі игілікті істер атқаруда.

М. Әуезов атындағы ОҚМУ ұжымы да осындай қиын-қыстау шақта Елбасымен біргеміз, халықпен біргеміз, індетті жену үшін барлық күш-жігерімізді жұмсаймыз деп мәлімдейміз. Жастарға патриоттық рухани тәрбие беруді басты мақсат қойған университет ұжымы – «түрлі түсті революцияларға қарсы» жастардың бойында иммунитетті дамытып, елін, жерін, мемлекетін сүйуге баулуды ең басты мақсаты санайды.

Өз кезегінде М.Әуезов атындағы Оңтүстік Қазақстан мемлекеттік университеті де карантин кезінде негізгі мақсатын жүзеге асыруда. «IS-VUZ» ақпараттық жүйесі, «Zoom» стриминг-сервисі, «Прометей» жүйесі ақпараттық ресурстары арқылы ГУГЛ КЛАСС РУМ, КУРСЭРА онлайн платформалары тағы басқа оқытудың қашықтан білім беру технологиялары мен әдістерін қолдана отырып, оқытуды қамтамасыз етуде. Оқу процесін ұйымдастыру белгіленген оқу жүктемесіне, оқу жұмыс жоспарына, оқу бағдарламаларына, сабақ кестесіне сәйкес жүзеге асырылуда.

Елдеріне қайтпай білімін жалғастырып жатқан шетелдік 137 студентке жатақханада қашықтан білім алуға мүмкіндіктер жасалып, интернет және Wi-Fi жүйесімен қамтамасыз етілді. Барлық білім алушылармен қатар бұл студенттердің денсаулығы мен амандығы біздің назарымызда. Оларды

азық-түлікпен қамтамасыз етуге демеушілер де үлес қосуда.

Оқумен қатар тәрбие жұмысы да қашықтан ұйымдастырылып, #онлайнсабақОҚМУ, #Abai175 членджерін Қазақстан жастарына жариялауда. Оқытушылар мен студенттерден құралған еріктілер тобы әлеуметтік мұқтаж топтағы балалар және қарттар үйлеріне арнап медициналық бетперделер тігіп берді. Оқытушы профессор құрамы мен қызметкерлер жалақыларынан қол үзбей карантинде онлайн жұмыс кестесіне көшірілді.

Елбасының індетті ауыздықтаудағы арманы мен мақсаты елімен еншілес екені даусыз. Осындай сын сағаты кезінде үрейден аулақ болып, сенімді жоғалтпайық. Өз бастарын қауіпке тігіп, коронавируспен күресіп жатқан дәрігерлер мен тәртіп сақшыларына, еріктілерге өз алғысымызды білдіреміз.

«Тату үйге тақсірет жуымайды» дегендей, көпұлтты Отанымызда бұл мәселені тек бірлік арқылы еңсереріміз даусыз. Майқы би айтқандай «Береке түбі – бірлік, Бірлік түбі – тірлік, Жеңіс түбі – ерлік!». Ел болып бірігуден асқан бақыт жоқ! Мен тарихшымын. Ал қазақ этносы қоғамның әр кезінде мың өліп, мың тірілген халық. Жастар біздің расында да болашағымыз. Мен олардан елдің болашағын көремін және сенемін! Барлық сақтық шараларын қолдансақ, бұл індеттен де аман-есен өтеміз.

**Дария  
ҚОЖАМЖАРОВА,  
М.Әуезов атындағы  
ОҚМУ ректоры**